



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 7 Yangia anidakangma : f Tir Yimym i tir\_yimym

tir yimym TAPAK 3

**Ukraine-i Russia indang Ust-Luga port maneni amak**

**Nüngtugu tennis asayar Leander Paes BJP nung denogo**



VOL. XXIII ISSUE NO. 168 (ADOK 168) DIMAPUR RASEMNÜ (WEDNESDAY) RONGCHII (APRIL) 01, 2026 ₹ 5.00

## Manipur nung NSCN (I-M) züngsem pezü khesetba khukhua aitsür: NSF

**Imphal, March 31, 2026 (TYO):** March 28 aonung Kamjong district kübok Kasom Khullen nung NSCN (I-M) züngsem pezü khesetba khukhua aitsür ta Naga Students' Federation (NSF)-i metetdaksüogo.

Hongbei yimtsüung nung atalokba lendong atema asar aser temulung raksar ta parnok i ashi.

Naga nungeri Naga yimten latettsü atema yongyaa ataba mapang ka nung telungpur tsüngda kati ka tepsetogo. Iba inyakyim ya Naga nunger taginüba anema lir aser nija ajangzüksü atema telok sasep nung obang meputep adokba sayur ta NSF-i sangdong ka nung ashi.

Iba lendong nung asür kibongtem ochi aser temeten meshia parnok mang aremtsü memulungba nung onokia pusema nungiter ta NSF-isa ashi.

Naga linük nüjiso atema bendanga agüja inyaktertemi pei külem züngsem khesetba atema süoki ia bilemer ta parnokisa ashi.

NSCN (I-M)-i bushisüngdang ka tenzükba pelaa agizüker saka iba ya mapang züngzuka yur shinga tsütsü meshii aser tashishitsü melii inyaktsüla. Iba tatalokba nung aibelenba putetertem ozüng lateta aliba ama merenshia temeten agütsütsüla ta NSF-isa takhangba agütsüogo.

NSF-isa sendaktepa alir ajak dang aremzüksü aser longjema alitsü ayongzükogo.

Asenoki külem yimjung, akhüm aser temeten atema noktakba nungi masetshili kechiyong telok sasep nung mepetmesütep ajanga Naga yimten ken o memenendaktsütsüla ta parnok i ashi.

## Assam elections nung BJP nungi crorepati candidates teimba lir

**Guwahati, March 31, 2026 (Agencies):** Assam Assembly Elections 2026 nung crorepati candidate teimtibaji Bharatiya Janata Party (BJP) nung lir ta Association for Democratic Reforms (ADR)-i metetdaksüogo.

BJP candidate 90 asadanga nung parnok 79 crorepatir lir aser parnok sülen Indian National Congress candidates 99 nungi parnok 60 crorepatir lir ta ADR-i ashi.

Maneni, Asom Gana Parishad (AGP) candidate 26 nungi parnok 18 aser All India United Democratic Front candidate 30 nungi parnok 16 tashi crorepati lir.

All India Trinamool Congress candidate 22 nungi parnok 11, United People's Party Liberal candidate 18 nungi 10 aser Bodoland People's Front candidate 11 nungi 9 crorepati lir.

Ano, Assam Jatiya Parishad candidate 10 nungi parnok 7, Aam Aadmi Party candidate 18 nungi 6, Rajior Dal candidate 13

nungi 6, Communist Party of India (Marxist) candidate 2 aser Jharkhand Mukti Morcha candidate 16 nungi 1 crorepati lir ta ADR-isa ashi.

Assam Assembly Elections 2026 nungsa candidate 14% anema ozüng alema inyakba ken o tem benoka lir ta ADR-isa metetdaksüogo.

All India United Democratic Front (AIUDF) candidate 30 nungi 11, Indian National Congress candidate 99 nungi 28 aser Bharatiya Janata Party candidate 90 nungi 8 anema ken o tem benoka lir.

Maneni, Asom Gana Parishad candidate nungi 23%, All India Trinamool Congress 14%, Aam Aadmi Party 17%, Jharkhand Mukti Morcha 25% aser Rajior Dal candidate 15% anema ken o tem benoka lir.

Candidate temi Election Commission of India tsüngdang affidavits agütsüba nung ajemdaker ADR report ya adoker.

## DTO office Dimapur belener

**Dimapur, March 31, 2026 (TYO):** District Transport Officer (DTO), Dimapur-i District Transport Officer, Motor Vehicles Department office belentsü osang metetdaksüogo.

Inter State Truck Terminus (ISTT), 7th Mile, Chumoukedima nung aliba office Purana Bazar, Dimapur nung

Inter State Bus Terminus (ISBT) tesüleni belentsü ta DTO, Dimapur-i sangdong ka nung ashi.

Iba ya sorkar nungi temelaba meshir aser Transport Commissioner, Nagaland-i tuyuba ama inyaker aser April 1, 2026 nungi office tasenba nung mapa tenzüksü ta paisa ashi.

## NITI Aayog-i NE aser Himalayan states nung senotsü asadang Centre sorkari hill states atema Rs 25,000 crore lemzüksür

### E.II RESULTS: NE/ HIMALAYAN STATES

E.II.1 Table 12: Final Ranking of States for 2023-24

States	FHI Score	Rank 2023-24	Quality of Expenditure	Revenue Mobilisation	Fiscal Prudence	Debt Index	Debt Sustainability
Arunachal Pradesh	59.5	1	97.6	40.6	59.0	62.0	38.3
Uttarakhand	52.5	2	28.2	83.3	26.6	66.5	58.1
Tripura	44.1	3	24.6	23.5	38.5	66.2	67.7
Meghalaya	41.5	4	66.6	38.2	12.8	57.8	31.9
Assam	39.1	5	30.9	58.3	16.4	69.2	20.4
Mizoram	33.4	6	28.9	37.8	29.9	69.1	1.4
Sikkim	32.5	7	27.3	44.8	10.8	56.5	23.3
Nagaland	27.1	8	15.8	20.8	21.7	41.7	35.3
Himachal Pradesh	22.0	9	13.2	64.2	3.0	24.9	4.6
Manipur	17.6	10	11.8	0.5	19.4	30.3	26.1

**New Delhi, March 31, 2026 (Agencies):** NITI Aayog-i Fiscal Health Index (FHI) 2026 sayaba nung Northeast state kar nung senotsü jenjang tajung aser kar majung ta asadangtetba sayua metetdaksüogo.

NITI Aayog-i tang mezüung atema Northeast aser Himalayan state tem balaka asadangogo aser "Achiever" category tematiba nung Arunachal Pradesh lir.

Parnokisa "Performers" telemsa nung Meghalaya, Assam, Mizoram, Sikkim, aser Tripura züngoka lir.

Külen, Himachal Pradesh, Manipur, aser Nagaland state tem "Aspirational" category nung züngoka lir aser iba ya

expenditure aika aser revenue kanga ajemba telemsa lir.

Külen, Centre sorkari yashi Special Assistance to States for Capital Investment (SASCI) 2026-27 nung 'Pride of Hills' kübok Rs 25,000 crore lemzüksüogo.

India nung hill states 9 nungi Arunachal Pradesh-i Rs 4,900 crore lemzükba sen teimtiba nguogo aser tajemtibaji Mizoram-i Rs 100 crore lemzükogo.

Iba scheme ya hill states nung senotsü aser terenlok tsütsü tayongzükba balala ajuruba atema tenzükba lir. Tenemkong aliba, nütsüung yongsük ajemba aser revenue angulen peria maliba khurettem

ajanga hill state tem debt-to-GSDP ratios aser lower own-tax revenue dena senotsü tsütsü tashimait lir ta ketdangsürtemi ashi.

Arunachal Pradesh dak alia Himachal Pradesh nem Rs 3,920 crore, Nagaland nem Rs 3,880 crore, Uttarakhand nem Rs 3,460 crore, aser Tripura nem Rs 3,450 crore lemzüksüogo.

Maneni, Manipur nem Rs 2,400 crore, Meghalaya nem Rs 2,070 crore aser Sikkim nem Rs 820 crore lemzüksüogo.

Iba additional outlay ajanga tang agüja aliba allocations yariteptsü aser hill regions nung terenlok bener arutsü ta ketdangsürtemisa ashi.

## Aliba aser Chungtia yimtak Congress Candidate nübuyim sentong agi



Congress Candidate T. Chalukumba Ao-i tanü Aliba aser Chungtia yimtak election nung noktakba sangdongba sentong agir kelen Chungtia yimsürtem den klemi tangokba noksa.

**Mokokchung, Metsüremi/ March 31 (TYO):** Aruya aliba 28 Koridang Assembly Constituency by-election nung Congress Candidate T. Chalukumba Ao-i tanü Aliba aser Chungtia yimtak election nung noktakba sangdongba agiogo.

Tanü iba sentong nung Member of Parliament aser Nagaland Pradesh Congress Committee (NPCC) President S. Spongmeren Jamir, NPCC Working President C. Apok Jamir, President District Congress Committee (DCC) Kohima, Mokokchung DCC aser 28 Koridang AC nungi congress lenir aika den Congress

phukhümer aika dena liasü.

Congress Candidate T. Chalukumba Ao-i tanü yim anaprongla nung iba sentong nung jembidang tang election nung pa adokra Nagaland Legislative Assembly nung opposition-less sorkar inyakyim ya anenadoktsü ta ashi.

Koridang nunger dang pai iba election nübur ajaki pei temeden vote pei sasa agütsütsüla aser ibaji ajanga te, melenshi tulu alitsü tamanga akar ta ashi. Paisa tangar tetoktepertemi terenlok mapa inyaktsütsü ta ,süzüka jembiba nung temelung malemtsüla aser sen nem m e m s ü z ü k d a k t s ü t s ü l a

tekümdangtsü metetdaksü.

Chungtia aser Aliba yim ana nung MP aser NPCC President S. Spongmeren Jamir-i jembidang Congress Party-i Congress Candidate T. Chalukumba Ao dak sempet tajung reprangteta kanga dang temelung lemteta shimtetsüogo, anungji Koridang nungeri Koridang lima tesangwa ka asoshi congress nem vote agüja adokdakjangta ayongzükba liasü.

Kasa sentongtem nung DCC Mokokchung Vice President , I. Temsu Jamir pai -a jembi, iba den ano Aliba aser Chungtia yimden tenüng nung yimssürtemia shilem agia jembia liasü.

# FAC nung 2nd PSA Mock Parliament ayongzük



**Dimapur, Metsüremi/March 31 (TYO):** Department of Political Science, Fazl Ali College, Mokokchung ajanga March 31, 2026 nü '2nd Political Science Association (PSA) Mock Parliament' sentong "Democracy in Action through Youth Debating the Future of the Nation" omen kübok ayongzüka liasü.

Iba sentong nung Dr. Lipokrenla Jamir, Assoc. Professor & HoD Dept. of Political Science menden liasü aser democracy amshitsü atema political education nüngdakba indang rateta ashi.

Sentong nung alakteta jaoker Lanulemba Longchar (Alumnus), Tir, Ao Kaketshir Mungdang liasü.

College nung taoba mapang zünga alir ka ama küm ishika

tejakdang iba maongka manguba bilemtet aser tang azünger temi maongka balala anguba indang medemdanga liasü.

Pai kaketshirtem dang pei sempet yari maongka ajunga agitsü ajungshia liasü.

Pai lanurtem dang ozüing yanglur mapa nung tetsüing ajemoktsü, o intepba aser sensaksem akaba nung shilem agitsü ayongzük aser linük ya ola madoki mainer saka lanurtemi ola adokba, jembitsü jangraba aser nükjiding yur aniba ajanga ainer, ta ashi.

Lenir ta asüba ya o intepba aser langzütepba nung takok anguba indang masü saka temelenshi asoshi lenmang sayutetba indang lir ta ashi.

Iba session nükjiding ya Dr. E. Benrithung Patton, Assoc.

Professor ajanga lemsatepa liasü. Mock Parliament Session mapang Political Science kaketshir temi AFSPA, Maulana Azad National Fellowship, Women and Child Development aser Uniform Civil Code amala onük nung o intepa liasü.

O intepba, policy indang jembiba nung lanurtem shilem agidakja democracy takum kumdakja awareness agüja lenirtem anitetsü aser linük tarutsü atema temlung agütsütsü mechi iba sentong ya ayongzüka liasü.

Iba sentong nung All India Radio Mokokchung, MCTE, Queen Mary Higher Secondary School aser Soul House Academy nungi tesayur aser kaketshirtem den FAC nungi tesayur aser kaketshirtem dena liasü.

# AR-i Jalukie nung drone exercise agi

**Dimapur, Metsüremi/March 31 (TYO):** Spear Corps kübok Assam Rifles temi tactical surveillance aser technical handling skills tali tajungba akumtsü mechi Drone Training Node, Jalukie nung anogo ana drone exercise agia liasü.

Operational roles balala nung unmanned aerial systems amshiba nung rangloker iba sentong nung flight drills aser

situational simulations densema agia liasü.

Iba exercise ya DIG, 6 Sector Assam Rifles-i repranga shilem agiba team tem renemshiba semdanga liasü.

Pai technical setups nung temlung asüba lemsatep. Pai semdangba ajanga sepaitem inyakyim nung technology amshiba mezüing südaksüba sayur.

DIG-i sepaitem den sensaksemba mapang pei sempet tali tajungba nung amshitsü ajungmesoa liasü.

Paisa modern operation takok anguba nung aerial technology ya tongtipang hadir ka lir ta ashi aser sepaitem dang regional security tali tajungba akumtsü asoshi item temelenshi akaba sapang nung takotet akumtsü atema bendanga agütsütsü ayongzük.

# DGC nung 'International Day of Zero Waste' amung



**Dimapur, Metsüremi/March 31 (TYO):** Dimapur Government College indang Science Club ajanga March 30, 2026 nü "International Day of Zero Waste" nüngtem nung mürekmejuba sentong ka ayongzüka liasü.

Iba sentong ya college campus telungzük nung ayongzüka club züngsem temi shilem agia liasü. Iba mapang parnoki shisaa aoba aser shisaa maoba jana tem bendena lemsaa liasü.

Kasa mapang plastic amshiba ajemdaksütsü aser eco-friendly yimya, talisa tanaben amshitetba oset amshiba, süngdong-lidong asoshi ali tebu bendenba amala awareness agüja posters tem sayua liasü.

# Health & Family Welfare ajanga Licenses atema metetdaksür

**Dimapur, Metsüremi/March 31 (TYO):** Department of Health & Family Welfare ajanga Health Centres/ Hospitals/ Clinics nem License agütsüba indang onük kanga süoki ia jembi aser Health Centres/ Hospitals/ Clinics aika Nagaland Health Care Establishment Authority Act-1997 (NHCE) kübok manidakba indang jembia liasü, ta sangdong ka ajanga ashi.

Anungji Department ajanga Nagaland nung aliba Health Centres/Hospitals/Clinics ajunga dang mapang liwatsü ita

trok lia Renewal of License atema apply asütsü metetdaksür, ta ashi.

Health Centres/ Hospitals/ Clinics tem melapokdang License ya mezüing meshitsüla. Ano Pharmacies kar nung consultation atema Doctors tem amshir. Doctor ka Clinic nung inyaksü tim, saka Pharmacy nung doctor ka amentsü atema Clause - 9 of the Nagaland Health Care Establishment Authority Act-1997 kübok License ka meshitsüla, ta Department sangdong ajanga ashi.

# Kaketshir temi Niuland nung police station semdang



**Dimapur, Metsüremi/March 31 (TYO):** Beti Bachao Beti Padhao sentong kübok District Administration Niuland aser District Hub for Empowerment of Women, Mission Shakti ajanga Modern High School, Niuland nung azüngertemi March 30, 2026 nü Niuland Police Station semdangba sentong ka ayongzüka liasü.

Inzung Lungalang, ASI, aser Ningsangyanger, LC nati kaketshirtem anir police inyakyim sayua nürburtem aser talisa tetsür chanu aser tetsürtem

asoshi ozüing kübok teyari balala aliba angatetdakja liasü.

Kelengunuo Solo, EAC Niuland-i iba inyakyim ya kanga tongtipang lir ta ashi aser kaketshir tetsür temi nüngdakba mapang police dang teyari meshitsü atema tongtipang yimyatem meteter, ta ashi.

Tetsür kaketshir nem pei temeden aser police-i teyari agütsüba angatetdakja parnok temlung uludaksütsü nükjiding nung iba sentong ya ayongzük.

# ASRGiE training anogo ana agi



**Dimapur, Metsüremi/March 31 (TYO):** Anogo ana Adolescent Sexual and Reproductive Health in Emergency (ASRHIE) training RHFPC, FPAI nung March 26-27, 2026 anogotem agia liasü. Iba sentong ya emergency settings nung teinlonglong temang anema aliba indang angatetdaksütsü nükjiding nung lanurtem asoshi ayongzüka liasü.

Iba training ya Program Officer-i anir FPAI team ajanga agi aser youth volunteer temi yaria, shilem agirtem dang

lenmang balala sayua liasü. Iba sentong nung adolescent sexual and reproductive health (ASRH), impact of emergencies on young people aser Minimum Initial Service Package (MISP 6+1) amala onüktem nungi jembia liasü.

Sentong nung shilem agirtemi sensaksemba, case studies, scenario-based learning nung shilem agia liasü. Iba mapang services ajema anguba, itashilem aoba nung timtem ajuruba, emergencies mapang timtem ajuruba indanga lemsatepa liasü.



Lok Sabha nung Opposition lenir Rahul Gandhi-i Keral kübok Perambra vnung assembly elections magi tsungda lokti senden ka nung o jembiba noksa nung angur.

### Kerala nung BJP-i party manifesto sangdongogo

**New Delhi, Metsüremi/ March 31 (Agencies):** BJP-i Mongolbarnü taruba Kerala Assembly elections atema manifesto sangdongogo. Party tekolakba Nitin Nabin-i, state nung terenlok maparen balala aser temple dak sendakba tenangzükba balala agüja liasü. Tongtibang tenangzükba rongnung kaji, nungdaka aliba tetsürtem, amitsürtem aser arishi küm 70 tema aliba tientet rogotem tem nem ita shia welfare pension sen 3000 agütsütsü nangzükba densema lir. Ano Kerala nung aliba kibong shia nem ita nung tzi liter 20,000 angati agütsütsü nangzükogo. State welfare sentong nung

shilem ka ama sensaker kibong tem nem küm shia Onam mapang ka aser Christmas mapang ka ta LPG cylinder anana angati agütsütsü nangzükogo. BJP-isa, nungdaka aliba tetsürtem nem Bhakshya Arogya Suraksha card agütsütsü. Iba card nung ita shia mozü aser aonsotsü alitsü atema sen 2,500 recharge sütsütsü. Terenlok mapa dak sendakba nung BJP-i Kerala nung AIIMS ka amenoktsütsü aser Thiruvananthapuram aser Kannur na sendaktepba high-speed railway network ka yanglutsütsü nangzükba liasü. Manifesto nung temple administration aser Sabarimala

indanga shisema lir. "Onoki Devaswom Boards asüngsashija Sabarimala, Guruvayoor aser tekülemba tesem ajak kümzükba toktsütsü," ta manifesto nung shia lir. Parnokisa, mapang atakzükba yur Sabarimala gold auyaba ken o ya CBI nem bushisüngdang südakja ochi mashi inyakyim tembangdaksütsü, ta ashi. Kerala nung election ya April 9 nü agütsü aser vote May 4 nü azüngtsü. State nung Assembly menden 140 lir. Left lenir Pinarayi Vijayan ya 2016 küm nungi state indang chief minister lir. State ya Left Democratic Front (LDF) sorkari yimsü südar.

### Nüngtugu tennis asayar Leander Paes BJP nung denogo

**New Delhi, Metsüremi/ March 31 (Agencies):** West Bengal Assembly elections agütsü lia nüngtugu tennis asayar Leander Paes Mongolbarnü New Delhi kübok party headquarters nung Bharatiya Janata Party (BJP) nung formally denogo. Pa Union Ministers Kiren Rijju aser Sukanta Majumdar nung matsüngdang party nung züngoksema liasü. Party nung adenba sülen pai, linük nung aliba lanurtem tenzüktsü atema Ato Kilonser Narendra Modi-i pa nem maongka agütsüba atema kanga pelaba lemsatep. Paes-i ashiba agi, iba ya pa taküm nung kanga dang tongtibang mapang ka lir. Paisa, Home Minister Amit Shah aser BJP National tir Nitin Nabin na danga iba

maongka asoshi kanga pelaba metetdakja liasü. "Tanü ya ni asoshi kanga tongtibang anogo ka lir. Ni kü nem iba maongka agütsüba atema PM Modi, Amit Shah aser Nitin Nabin nung dang kanga pelar. Linük nung aliba lanurtem tenzüktsü atema iba ya ni asoshi maongka tajung ka lir. Linük tenzüktsü mapang tonggogo. Iba ya BJP nung adenba slip ka dang masü saka khuret tulu lir," ta pai ashi. Paes-isa, pa jakzükdak bilemtetshia jembiba mapang, pa West Bengal nung aso aser Bengali heritage den sendaktepa lir ta ashi. "Ni Bengal nung aso.. Kütsü ya Bengal nungi jakzükba lir. Ni ina atuba mapang infrastructure aikabo maliasü," ta pai shisem. Paes-i tawa Kolkata nung

Nitin Nabin den ajurutep aser iba ajanga pa BJP nung adentsü akok ta bilema liasü. Pa 2021 küm All India Trinamool Congress (TMC) nung aden aser party atema 2022 Goa Assembly elections nung nüboyimba sentong nung shilem agia liasü, saka pa bo metoktep. Pa Goa nung TMC nung aden, kong West Bengal Chief Minister Mamata Banerjee-i pa pelashishia agizükba liasü. Ajisüaka pa 2022 küm January ita sangdongba party indang Goa state committee (züngsem 66) nung densema maliasü aser iba ajanga party nung pa shilem indang ashishi tenzük. Menden 294 atema West Bengal Assembly election ya shilem ana küma lemsar April 23 aser April 29 nü agütsü aser vote ya May 4 nü azüngtsü.

### PM Modi-i Gujarat nung semiconductor plant ka semzüktsü

**New Delhi, Metsüremi/ March 31 (Agencies):** Ato Kilonser Narendra Modi-i Mongolbarnü sen crore 3,300 entoka yangluba Keynes Technology indang semiconductor plant ka Ahmedabad kübok Sanand GIDC nung semzüktsüogo. Linük nung ibala mesükba facility tanabuba lapoka semiconductor manufacturing sentongtem tejakleni bener odar. Iba plant ya semiconductor mission nung shilem ka lir aser iba ajanga domestic chip production capacity tashi itshitsütsü imlar. Sentong nung o jembiba mapang PM Modi-i, iba sector nung India nükjidong indang lemsatep aser ashiba agi, global semiconductor supply chain nung tongtibang shilem agütsü atema India jenjang yangludar. Paisa, India ya alima temelenshi repranga atar ka masü saka lenir ka akümtsü renemdar, ta ashiba den tawa sayaba budget nung Semiconductor Mission 2 amenokba indang lemsatepa liasü. PM-isa, Pax Silica inyakyim

nung India-a adentsü atema telemtetba agiba ajanga semiconductor yanglutsü atema nungdakba tongtibang mineral tem alizüktsü asoshi teyari agütsütsü, ta ashi. Gujarat science and technology minister Arjun Modhwadia-i ashiba agi, iba facility nung ya anogo nung chip lakh 7 yanglutsü. Iba facility melapok tsungda Hombarnü jembiba mapang pai ashiba agi, "semiconductor manufacturing chain nung shilem ka ama PM Modi-i asüng Sanand nung sen crore 3,300 entoka yangluba Keynes Semicon plant semzüktsütsü. Iba ya linük nung tanabuba plant asütsü aser idaki anogo nung chips lakh 7 yanglutsü." PM Modi-i February ita Micron semiconductor plant ka lapoktsüba sülen hopta ishika lir tang iba plant ya lapokogo. Kasa anogo PM-isa, Gandhinagar kübok Koba Tirth nung Samrat Samprati Museum lapoktsüogo. Iba Museum ya Ashoka'er semchir Samrat Samprati tenüng nung jatsü aser iba ya Jainism puti otsü aser senmang dak rangloker lir.

### AP nung Maoist lenir tejen ka den züngsem 8 bendanga agütsü

**New Delhi, Metsüremi/ March 31 (Agencies):** Communist Party of India (Maoist) central committee züngsem aser Andhra Odisha Border Special Zonal Committee secretary Chelluri Narayana Rao, shiba dang Suresh ta ajar pa Hombarnü bendanga agütsüogo. Pa den Chhattisgarh, Odisha aser People's Liberation Guerrilla Army nungi züngsem ti bendanga agütsüogo, ta ketdangsurtemi metetdaksü. Iba telok yagi Mangalagiri nung parnoki bena aliba prangbong injang aser hadirtem, general of police Harish Kumar Gupta aser tanga ketdangsurtem matsüngdang tokja liasü. Centre-i India nungi Maoist movement raktoktsü atema March 31 atakzüktsür aliba atongtsü anogo ka lia Narayana Rao bendanga agütsüogo. Osangbenertem den sensaksemba mapang Gupta-i ashiba agi, bendanga agütsür aliba Maoist lenir aser züngsemtem nungi osang angazükba sülen police-i prangbong 19 nguteta liasü. Prangbongtem rongnung INSAS rifle ka, BGL ana, .303 rifles pongu, SBBL pongu aser tanga prangbong trok den cordex wire aser tanga hadirtem densema lir. Director general of police-i ashiba agi, Narayana Rao

atema sen lakh 25 agütsütsü nangzükba liasü. Pa ya Srikakulam district, Vajrapu Kothuru block kübok Pedavanka yimtsüng nungi lir. Pa 1990 küm November ita CPI (Marxist-Leninist) People's War squad nung dena liasü. "Taoba küm 36 tsungda pa rank balalai atu aser mapa balala inyakogo, kong special guerilla commander aser state military commission züngsem aser secretary mapa abenba densema lir. Iba sülen pa central committee-i ajungket aser AOBSSC secretary kümdaksü," ta director general of police-i ashi. 2018 küm MLAs Kidari Sarveswara Rao aser Siveri Someswara Rao na tepsetba ken o nung Narayana Rao densema liasü. Pa Andhra Pradesh, Odisha aser Chhattisgarh nung police tem medanga atar amakba ken o tem nunga densema liasü. Osangbenertem den sensaksemba mapang Narayana Rao-i ashiba agi, Maoist lenirtem tepsetba aser apuba ajanga iba movement samayonga aoba agi pa bendanga agütsü. "Iba movement ya local nüburtemi pu masemer aser party nung züngsem tasen manioker. Nüburtem ya tribal tem aliba tesemtem nung terenlok maparen balala agi atsüa arur," ta pai ashi.



Ranchi, Jharkhand nung LPG cylinders tazüng amentepa yur aliba security personnel kati nüka ataba noksa nung angur.



## TIR YIMYIM YIMOBILEM (EDITORIAL)

DIMAPUR WEDNESDAY, APRIL (RONGCHII) 01, 2026

### Kati ka anükba yimten

**A**senok ama nübortemi yimten yimsüsürtem shimtetba 'democratic' yimten yimli nung tajung kaji, akhi mapang chuba yimli nung ama masü, nübortem madak nisung kati mesüra kibong kati tashi amshia yimten telemtetba magir, saka nübortemi shimtetba yimsüsürtemi parnok senden nung pei lima aser nübortem ajungtsü asoshi ken o benoka jembir telemtetba agir aser temzüng ozünga yamaji senden nung benoka jembir külenang ajaki mulungba nung mesütetyonga, teimbai mulungba nung telemtetba agia inyaka aoer. Atangji, nübortemi shimtetba yimten yimsüsürtem mapaji telemtetba agitsüba dang lir, anungji parnoki agiba telemtetbatemji mapa küma inyaksü asoshi government nung ketdangsertem lir, anungji yimsüsürtemi latetba temzüng ozüng aser parnoki lemtetba sentongtem mapa küma inyaka aotsübajibo ketdangsertem mapa lir, anungji yimsüsürtemi nüka lia ketdangsertemi yimten telemtetbatem mapa küma inyaksü. Aji oda, yimsüsürtemi lemtetba yimsüsürtemi nüka inyakdaksür asünungji, ketdangsertem jagi yimsüsürtemi nükensüba mapa ajak shitak-shitak inyaka aotsü. Atangji, nübortemi akümba yimten mapa junga inyaka aotsü asoshi yimsüsürtemi nüka lia ketdangsertemi inyakba nungji matem, saka ano yimten yimsüsürtem o ketdangsertem na pronglai mapa ajak ochishia shitak inyakdaksütsü asoshi parnok madak obendangertem lir, anungji kodangsa yimsüsür aser ketdangsertemi nübortem akoksatsüsa mapa meshitak inyakdir, iba mapaji obendangertemi reprangdang aser ken o ji okadak benoka angadanger obendang agütsür. Aji oda, yimten yimsüsürtema sang mesüra ketdangser tulerrema sang, pei mapa nung ochimashi aser meshitak inyakba putetra, obendangdak nungi obendangertemi aitsütsü aser pei mapa dak alang temerenshi agütsütsü. Iba amaji yimten mapa nung kati ka mita reprangba ajanga nisung ajaki mapa shitak inyaksü tangatetba aser nükjidong nung democracy nung yimten inyakyimji yamaji lateta lir. Ibaji dang masü saka ano nübortem makoksadaksütsü asoshi, nübortem asoshi terenlok mapa inyakba 'contract' mapatem nunga yimten yimsüsürtem aser parnok kinungertem nem meinyakdaksür. Iba amaji nübortemi yimten yimsüsürtem shimba yimten nung yimten yimsüsürtem dang nungibo yimten tashiji nübortem dakang tuluba keta lir, kechiyong yimsüsürtemjibo nübortemi yangluba oset ka ama dang, aser teyanglurji nübortem lir. Iba tashiji amer, yimten yimsüsürtem, ketdangsertem aser obendangertem ajakji nübortemi mita anüker aser nübortem anema inyakra nübortemi parnokji atsüngdoker. Iba ama yimten inyakyim bentet-benteta lateta alibaji reprangdangra, asenok government mapa nung ochimashi aser tim masüba mapa inyaksüba lenmang kanga mesüa lir. Ajisüaka, meyiper kechiba asen lima nungbo government inyakyim ajak nung ochimashi adoker aser kechiba terenlok mapa kata shitak meinyakteter? Iba telangzübaji kodang bushidangdir, yimsüsürria, ketdangseria aser obendanger o nübortem natia 'ajakji ni tai' ta ashitsüsa kati ka anüksü toktsü ser nung, kati ka ajungshitepa ochimashi mapa inyaksüang jangraba purtemji asenoka ta jangjatsü. Aji oda, asen lima nungbo tenüng agi yimten tashi aser iba khuretji abener dang ashi, yimsüsürtem o ketdangsertem na longjemer nübortem akoksadaksütsüsa inyaker aser nübortemia tai dang taia ta meshiteter, kechiyong tai nungji nübortema dena lir. Iba dakji alaka, ano asen lima nung takar kasa mejungketa akar saka makar kabo relief jang den chiyongtsü aon-a malitet timatemer ta asüba kati ka anüker masü saka katiang ajak anüksüsa nübortemi mashilen nungi tashi agütsüba ajanga atalokba tensa tia ka asütsü. Aji oda, yimsüsür-a ni, ketdangser-a ni, contractor-a ni aser okadak tashi amshiangji ni ta ser, tenüng agibo mapa lemsar inyaker, saka shitakba nung teinyaksangjibo kibong ka dang ta süra, iba limaji kodaser ajungtsü? Atangji, iba tensa taji tanübo ni atema kanga junger amai, saka ibaji pei lima raksatsü bomb yanglur amai, iba bomb jagi asensasa asen poksettsü. Ibaji tanü asen lima, anungji asüng yamaji mataloktsüsa asenok ajak pei lima aser nübortem meimba mitkar aser teinyaker kaka asütsüla.

## OLEMSABANG

### ASEN SOBALIBADAK AKETBA TONGTIPANG KAR SAMADAGI

- L. Kika Pongener

Otsüla-oboula nunger mapang nungi asen Aor sobaliba nung; nisung asü-ama dang 'Senlem' sentsüh-senmang indang jembiba mensem; iba ya lepkomong temer külen akar. Ano sadi-mendi mapang nung; 'Mensem' aser 'Jeptsü'...Iba ya-a kibong tasen akümer; kibong kümer lia aotsü atema sobaliba indang sayubentsü o ashitsü kinunger anatsülen senteper mensem akar. Tanü putu nung asenok mapa mela-mela atemtsü asa-a; iba mensem/jeptsü ya 'sadi kulizüng' agizüka kibong maküm dang jilia agia atokba ya tai lir. Shitakba-bo iba mensem/jeptsü ya sadi kulizüng agizüka kibong kümer külen dang akabaji tajungba aser aji shitakba. Ano asü-ama dang sentsüh-senmang indang jembiba 'senlem' mensem akaba...Aser sadi-mendi mapang sobaliba sayubentsü o ashitsü mensem/jeptsü akaba; iba mensem ana yabo nubu sayutepa tejanur ajak ajaba mensem ka masü; saka kinunger-sosem anasatibapur teshimtet dang sentepa akaba mensem ka lir. Tanü putu nung aikati ibaji kanga junga mangateti benshiba angur. Anungji iba ocet nung iba indangji tera rajema angatetsü merangdi.

Sadi-mendi mapang 'mensem' aser 'jeptsü' akaba ya benjong ka masü; iba ya kinunger-sosem anasatiba-pur, anuk-apang, anuk-amo, tetsü-teko, kin-kidong...Itemji senteper kibong tasen akümstüpur dang lia aotsü atema sobaliba aser libaliruyim sayubentsü o ashitsü mensem akar. Anungji iba mensem nungpo tang ashirtemji dang jateper. Iba mensem nung ken o jembir-jia, ken o jembi ashir, kenshi-oshir, o tsüngro songa jembir apia kinunger-sosem masüba tangar nem jembidaksütsüba masü; saka tejembitsü tata-yimpuri dang jembir. Tatishitsü...Kiyimsanger tsütsü nungi shibai jembidir...Ni tebu, tebu-tanübu, tetsü-teko, anuk-apang, kidong...ta 'shibaji shiba' ibaji tejangja metet-pelar dang jembir. Kiyimlar tsütsülena iba amaji kinunger-sosem anasatiba-purtemi jembir. Tanü putu nung ibaji mangateti, nubu sayutepba lokti-senden ka amai kümdaksüogo...Pei jungteper apia tajatsüpur/majatsüpur ajak ajaba agi kinunger-sosem ta asüba temeim-to mali pongpa-pongpar küma odagi. Mensem kar nungpo tejembiri ibaji tejangja metet-pela mesui jembiba agi...Sentepa alirtem ratar...!!!???

Ano asü-ama mapang lepko-mong temer külen; sentsüh-senmang indang jembitsü 'Senlem' mensem akar. Tanü putu nung iba 'senlem' mensem nunga; tajatsüpur, majatsüpur kecha mebendang; pei jungteper apia ajar. Shitakba-bo iba 'senlem' mensem nung ya...Senmanger, kinunger-sosem, teroknumong, asemnumong, kin-kidong; parnok den kuli atema anuk-apang aser tetsü-teko kar dendaksür. Iba senlem mensem yabo kanga atsüng-akanga; teshimtetpur dang sentepa sentsüh-senmang alemer. Kechiba sura iba mensem nung ya atsük-amok ken o jembitsü aika lir. Aji oda, lepkomong anogo asemnububa nung, sobaliba dak aketba tzü chigozük; aser tepelaba aser tenungsang agutsüba sarasadem ka agitsü kiyunger, kidanger, pur-ashipur, pur-bendanger, temba-tinur, pei jungteper ajak ajar; aser asür den tatempang tepila sentep agir...ajibo kanga tim aser libaliru mapa tajung lir; saka, iba senden nungpo sentsüh-senmang indang mejembitsü. Ano nisung sur küm ka ajungba anogo nung; karibo kinunger, kiyunger, kidanger, yimtsür-yimer, pur-ashipur, pur-bendanger, temba-tinur, pei jungteper ajak jaoka sarasadem mapang agir ....ajia akoker atemabo libaliru mapa tajung lir.

Kanga tesasatsüka, tanü putu nung asen sobaliba dak aketba tongtipang mensem ana...Sadi-mendi nung 'mensem' aser 'jeptsü'...Nisung asü-ama mapang 'senlem' mensem sentsüh-senmang alemba...Iba ana ya nubu sayutepba 'senden' ka amai tajatsüpur/majatsüpur kecha mebendang ajaba agi; asen sobaliba tajung-to samadagi. Aser kinunger-sosem, senmanger, teroknumong, asemnumong, anuk-apang, anuk-amo, tetsü-teko, onula/oyala nunger; temeimtep aser tesendaktep to mali sama-a odagi. Aji oda, benjong-bentsü, sadi-mendi aser tasü-tama mapang nungang kinunger-sosem, senmanger, teroknu-mong, asemnumong, anuk-apang, anuk-amo, tetsü-teko, onula/oyala nunger....itemji tali jangja-a meteter. Anungji iba sobaliba tajungji metsünga-reta wazüka yudi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Kerala state election agitsü lia Khristanpur tebilemstsü akar



India Ato Kilonser Narendra Modi-i 2023 küm April ita Kochi, Kerala nung Khristan denominations balala nungi lenirtem den ajurutepdang tangokba noksa ka yangi angur.

**Thiruvananthapuram, Metsüremi/March 31 (Agencies):** Tamangba yimsü tsütsü demographics melenshiba, kin tilatem nem teyari agütsüba nung kasa masü ta tai tongloksüba aser Hindu nung bhukumba Bharatiya Janata Party (BJP) jenjang tajung akumba ajanga Kerala nung taruba ita tetenzüklen state elections agitsü lia Khristanpur tebilemstsü akar.

India south tsütsü aliba iba state nung nütsüng yongsük shilem 18.4 shi Khristanpur lir aser mapang talangka nungi parnok ya election nung tashi tulu ama lia secular nung rangloka aliba Congress-i aniba United Democratic Front (UDF) den dena aru.

Communist Party of India (Marxist)-i anir aliba tang yimsü tesüdak Left Democratic Front (LDF) coalition atema Khristanpur tebilemstsü balala bentettsü ya tongtipang akumer, shirnok kümsük tasembuba inyaktsü tebilemsta nung tokteper.

Tesüiba elections ana nung Khristanpur aika LDF tsütsü meyipogo, kechiaser social welfare programs tajung aser Khristanpuri aniba telok den alliance aliba ajanga atsür, ajisüaka tangbo item tesendaktep mejungi kumogo.

Latin Rite Catholics amala telok temi international port ka mechi 2022 nung longkak aitiba nungi adokba metokmeperi mebenteti aliba mechi yimjak nung state ketdangsür den raratepa aru, koba ajanga akhi alemli mapang nungi angu pua aruba aser parnok takum alitsü lenmang shibangtsür ta ashir.

UDF aser LDF coalitions den ano Khristanpur mesüzüksü atema coalition tasembuba tentettsü meranger, koba BJP-i aniba National Democratic Alliance alitsü.

BJP-i Khristanpur aluyimer anir arutsü merangba den toktepa LDF-i secular governance nung rangloker

aser state-i shimba commission-i rongsenketzung tsütsü jenjang tamajungba nung aliba Khristanpur yaritsü atema shisatsü agütsüba mapa kuma inyaktsü nangzükur.

Patna High Court indang retired Chief Justice J.B. Koshiy-i anir züngsem asem agi akumba commission ajanga Kerala nung Khristanpuri loktiliba, shisaluyim aser senotsü tsütsü timtem ajurubatem asadanga liasü.

Syro-Malabar aser Latin arogo temi 'minority benefits ya state nung Muslim nungertem asoshi timba aser Khristanpur rongsenketzung tsütsü senzuka yutsür ta petitions agütsüba sülen commission ya tenteta liasü.

Item timtem tali jangjaa commission-i ashishitepba ken o 400,000 dak tema agizüka liasü.

Tawa The New India Express den sensaksemba mapang, Koshiy-i tapak 357 report nungya structural discrimination, shisaluyim tsütsü tetsükdaktsü ajuruba aser yimtenren tsütsü tali ajasaba nguteta lir, ta ashir.

Report nungjia Khristanpuri timtem ajuruba shia lir na, ta asüngdang dang, "Hao, lir. Aser kulia lir," ta Koshiy-i langzü.

Kerala State Minorities Commission indang tentet ya Muslim nung tsütsü tali temulung agüja lir ta commission yagi ngutet. Minority dak rangloker civil service exams asoshi training centers amenokba nunga sako masü, ta Koshiy-i ashir.

Khristanpur telok kar shisaliok aser tesem melenshiba ajanga tejakleni aoba lir, saka Latin Catholics aser tesüiba century mapang Dalits telok nungi tamangba yimsü melenba nisungtem rongsenketzung tsütsü timtem ajurur.

Migration yagia Kerala nung Khristanpur kanga melenshitsü. Bendang lima nung mapa inyakba ajanga

takum libaliru yimya melenshitsü, saka state nung aliba Khristanpur kasa jenjang nung lir.

"Lanur aika bendang limai aor, aser ibaji ajanga yangi lokti aser arogo nung ajema akumer," ta Koshiy-i ashir.

Kibong nung tanur ka kisüng asoba yimya aser lanurtem kibong akumtsü mejangraba ajanga nütsüng ajema akumer.

Akhi alemli mapang nungi Kerala shisaliok ki o jen tem Khristanpuri temba jenjangi ajungketa aru. Tamangba yimsü melendaktsütsü masü saka shisatsü prokshitsü nükjidong nung amenokba item schools aser colleges tem bureaucratic tsütsü tetsükdaktsü ajurur.

Parnoki ashiba agi, state universities temi menur degree programs tasen agizükba ajanga enrollment aser rongsen tsütsü kanga mejungi kongshir.

Kerala nütsüng yongsük shilem 26 shi Muslim nungertem lir aser parnokbo Indian Union Muslim League ama yimtenren tsütsü lungjemer nokdaker.

Ajisüaka Khristanpur ya akhi mapang nungi denominations balala aser yimtenren tsütsüa telok balala nung adener.

Yamaji lenmang balala nung meputepba ajanga BJP-i item tashi mait ajiteta Khristanpur nungi tejangja nübür tenet candidate shima lir.

Kasa mapang Kerala Catholic Bishops' Council ajanga tawa ang Khristan lanurtem dang yimten yimsüsüba nung shilem agitsü ajungshia liasü.

Ajisüaka Chhattisgarh aser Odisha ama state tem nungi Hindu nungertem telok temi Khristanpur anema mapa tamajung tali inyakba den state 13 nung anti-conversion laws benokba ajanga Kerala nung Khristan lenirtemi khukhua aitsür.

## ANO GO ABEN TSÜNGREM DEN

## Mosa masodang tsüraburtem

Tamang agi Mosa tsüraburi ita asem pa miima ayu. Ibr 11: 23.

Amran aser Jokobed-i bendanga agütsüba mapa indang jangratemtsü lir (Anitet 6: 30). Parnoki tanurji Tsüngrem sempet aser parnok takümüji senti lir ta angateta liasü. Parnok tanur Mosa ajanga Tsüngremi Israel nungertem anitettsüla. Tanü tsürabur aika Mosa tsürabur memesük lir. Parnoki tanur abener aser raksaa endoker. Ibai Egypt nung Farao shibai kinü tanur ajak Nile ayong nung enoktsütsü mela iba ozüng memesüka ma? Tanur raksaa endokba jagi parnok nem anogo tesangwaji mungudaktsür.

Yisu tebilemsta den koda balala! Pai tila tanurtem Pa dangi arudakjang ta ashir, Baptiba ajanga, parnok pa chirtem ama kinü akümer. Pa temenenpur ajak bushitsü aser kümzüksü aru. Yisui Pa taküm ajak asoshi taküm bendanga agütsü. Mashisa akümtsü meimlai alidang alima kümtetdakba asotsü asoshi tetsür ka mashisa akümba tamangji asadangtsü menungdakama? Tsüngrem telemtetba tongtetsü tetsürtem nem tamang tashi agutsü. Ajaki parnok nem temeim aser teyari agüjang.

## Khristanpuri Chhattisgarh nung Freedom of Religion Bill anemer

**Raipur, Metsüremi/March 31 (Agencies):** Chhattisgarh nung March 28 nü Khristanpur meyirijang aika yimtongi adoka state nung agizükur aliba bill tasenba anema ola adoka liasü.

Chhattisgarh Freedom of Religion Bill, 2026 ta State Assembly nung March 19 nü agizük, koba longkak aiter temi "black law" ka lir ta aitsür.

Iba bill nungya tashiyim amshia, ashikülaka, mesüzüka aser tim masüba yimya nung tamangba yimsü melenba atema takum tepiyong tepuokdak ayutsü densema temerenshi tesashi balala lir, koba state governor-i mulunga agizükba sülen ozüng ka akumtsü.

Iba yagi 1968 küm Madhya Pradesh state ajanga yanglua aliba ozüng ka melentsü, kechiaser Chhattisgarh ya 2000 küm Madhya Pradesh nungi state temeja ka akum.

Chhattisgarh nung aliba district 33 nung longkak aitiba mapang denominations balala nungi Khristanpur temi shilem agia liasü.

Langka tajung ka asoshi denominations balala nungi Samyukt Masihi Samaj (United Christian Society) kübok Khristanpur lungjema tang ya mezüng alitsü, ta Catholic Bishop Antonis Bara of Ambikapur diocese ajanga ashir.

Par diocese nunga Khristanpur 5,000 dak tema arua longkak aitiba nung shilem agia liasü. "Nisung kari asenok merenshitsü atema iba ozüng ya amshitsü ta tetsübo nung lir," ta Bara-i UCA News dang March 30 nü ashir.

Bishop Paul Toppo of Raigarh-ia par diocese nung Catholic nungertem densema Khristanpur 3,000 dak tema arua longkak aitiba nung dena liasü ta ashir.

Sarasadem sentong ama

anogoshi inyakba yimyatem ya iba ozüng tasenba kübok tamangba yimsü melenba ama meyipzüksü akok ta tamanger temi tsübor, ta pai ashir.

Toppo-i tamangertem dang süngjema aser saksalema alitsü ayongzükba liasü.

Bharat Mukti Morcha (India Freedom Front) ayongzükur züngsem Sunil Minj-i iba longkak aitiba ya ajanga nübürtemi tebilemstsü tulu akaba sayur aser Chhattisgarh nung Hindu nungertem bhukumba BJP sorkar inyakyim nung temulung malemer ta ashir.

"Iba bill ya ozüng akumtsü asoshi mebenokdang tongtipang stakeholders den shisa agitepba asü," ta pai ashir.

Bill tasenba ya Indian Constitution indang tanüla anema lir, kong senso nem pei mulungba yimsü amangtsü temeden agüja lir, ta Minj-i ashir.

"Asenoki mulungba nung amangtsü ashir, sorkari telemtetba magitsüla," ta pai ashir. Social activist temi state nung ozüng alema lokti tulu tamangba yimsü melenba kuli tejangja mali ta ashir.

State tesem ajunga nung onoki akhangba kasa dang - onoki state sorkar nem bill tasenba meyipa agidaktsüner," ta Bishop Emmanuel Kerketta of Jashpur-i ashir.

State yimtiba Raipur nung nisung meyirijang aika adenshia governor aliba ki, Raj Bhavan tsütsü jaja aotsü meranga liasü.

Iba longkak aitiba nung Muslim nungertem aser Bastar Bheem Army ama lisopur lokti tentet temia bhukuma liasü.

State chief minister Vishnu Deo Sai-ibo iba ozüng ya bhukuma nübürtem sobaliba maittsü wazüka ayutsü aser nübürtem tesendaktep tajung nung alitsü atema nungdaker ta ashir.

AO OSHI ANGAZÜKDAK:

TANÜ ANGAZÜKTSÜBA OJANG



Wangwang (adj) tzü tatsük agi aletba agi timatemer ama timatempa ( burning sensation) \* Tar nung timtem alidang tetsüing temepo kanga wangwanga timatemtsü. Wanu () tsük asendang aluba tsük teküp (husk, rice bran) \* Ak nem wanu chidaktsür.

OLONG PAITEP # 7461

Grid for Olong Paitep # 7461 with numbers 1-17 in various cells.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7460 TELANGZÜBA

TIPIEN :

- 1. Tesangra, 5. Mungo, 7. Kisen, 8. Salem, 12. Semki, 14. Kilem, 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon, 4. Aso, 6. Nile, 9. Alizüing, 10. Omen, 11. Lemta, 13. Ola, 14. Kin.

NAI-A YA METETTER



Tamil Nadu nung April 23 state assembly elections agitsü aliba jakdang Namakkal district nung March 29, 2026 nü alima otsü tasen ka yangluogo.

World Records Union-i Namakkal nung engineering college ground nung ayongzükba sentong nung sorkar ketdangsürtem, mapa inyakertem, college tesayurtem aser kaketshir 8,662-i election awareness symbols aser messages yanglua liasü aser iba atema World Records Union-i otsü tasen ka ta kuli agütsüogo.

Arunachal kübok Banderdewa nung "Dry Days" metetdaksür

Itanagar, March 31, 2026 (Agencies): Itanagar Capital Region nung District Magistrate Toko Babu-i Arunachal Pradesh kübok Banderdewa area nung "Dry Days" sangdongogo.

Assam nung Assembly elections agitsü aliba atema District Magistrate-i iba osang metetdaksüogo.

Election Commission of

India nungi tetuyuba anguba ama April 7 aser 8 (polling matongdang anogo ananü), April 9 (poll day), aser May 4 (counting day) dry days asütsü ta pai ashi.

Iba mapang yi ayokba dokangtem, bars, hotels, restaurants, clubs, aser yi ayokdak mesüra agütsüba establishments ajak shibangtsü

aser yi ayokba noktanger. Arunachal Pradesh Chief Secretary menden ser border districts ketdangsürtem den senden ka amendang iba lemte agiogo.

Superintendent of Police, Naharlagun, aser Tax and Excise Department ketdangsürtemi iba tetuyuba akangakanga benshitsü metetdaksüogo.

April 10 nü Assam HSLC results sangdongtsü: CM Sarma

Guwahati, March 31, 2026 (Agencies): Assam nung April 10, 2026 nü High School Leaving Certificate (HSLC) taidang indang results sangdongtsü ta Chief Minister Himanta Biswa Sarma-i metetdaksüogo.

Chief Minister Sarma-i

election nüboyimba sentong ka nung jembidang iba osang lemsatet. Iba sentong nung kaketshirtemi pa dang result adoktsü anogo asüngdanga liasü.

Board of Secondary Education, Assam-i ketdangsüa February 10 nungi February 27,

2026 tashi HSLC tatidang agia liasü.

ketdangsürtemi result publication indang inyakim kecha memetdaksüi lir saka results ya official websites aser designated centres ajanga agüja aruogo.

Assam Rifles-i Tirap nung solar lights agütsü

Itanagar, March 31, 2026 (Agencies): Arunachal Pradesh nung Assam Rifles-i Tirap district kübok yimtsüing ka nem solar lights agütsüogo.

Iba mapa ya Khonsa Battalion ajanga inyak aser meta talang pilar aliba Old Paniduria village nung parnoki

yimdaklir nem solar lighting agütsü.

Yimsürtem den amalitepa tangutsüpur nem solar lights lema agütsüogo ta Assam Rifles-i metetdaksü.

Yimdaklirtemia AR dang mapa tajung asoshi pelaba shiogo aser solar lights ajanga

parnok kanga ajangzüksü ta shisem.

Iba ajanga Khonsa Battalion-i community development tenangzükba agia inyakba aser Arunachal Pradesh nung civil-military relations akangshitsü merangba kuli agütsür.

Food Safety poster with logos (fssai, Eat Right India) and four sections: CLEAN (hands, tools, food prep), SEPARATE (raw meat, poultry, seafood, eggs), COOK (proper temperature), CHILL (refrigerator or cold water).



Myanmar yimtiba Nay Pyi Taw nung March 31, 2026 nü elected Pyithu Hluttaw representatives' group senden ananü buba amendang tangokba noksa nung angur. Mongulbarnü Myanmar indang Union Parliament house anaprong nungi military representatives telok ajanga U Nyo Saw ya tatong tir inyaktsü shim, ta Information Team of the National Defense and Security Council ajanga ashi. Min Aung Hlaing ya Pyithu Hluttaw (Lower House) group ajanga tatong tir shim aser Nan Ni Ni Aye ya Amyotha Hluttaw (Upper House) group ajanga shim. Union Parliament nungi züngsem ajak senteper presidential electoral college ajanga tatong tir asem nungi ka tir shimtsü.

### Somali army-i linük southwest nung tongtibang yimti ka atsüngogo

**Mogadishu, Metsüremi/March 31 (Agencies):** Somalia national army-i Southwest state nung yimti tulutiba aziükogo, aser iba ajanga iba tesem lenir Abdiaziz Hassan Mohamed Laftagareen-i mapa toktütsüsa kümogo. Hopta ana tejakdang pai aniba administration-i federal sorkar den tesendaktep kecha mayutsü ta sangdongba sülen tang iba ya atalokogo. Baidoa yimti ya Southwest state nung yimti tulutiba lir, kong international peacekeeper aser humanitarian agency tem amenoka lir. "Ni Abdiaziz Hassan Mohamed Laftagareen tanü March 30, 2026 nü Southwest State tir mapa nungi anener," ta Abdiaziz Hassan Mohamed

Laftagareen-i Hombarnü Facebook nung post ka ajanga metetdaksü. Pai iba mapa ya küm tenet tashi bener liasü. Pa ano küm pongu atema shimshiba sülen anogo ishika lir mapa nungi anena liasü. Iba election ya temzüng ozüing alema agi ta federal sorkari sangdonger liasü. Hombarnü Somalia indang federal sepaitem Baidoa-i ia iba yimti aziüoka liasü aser iba ajanga yimden yimsüsüba nung temelenshi ka adokdaksüogo. Iba yimti ya linük yimtiba Mogadishu nungi km 245 shi pilar lir. "Federal sepaitemi Baidoa atsüngogo. Iba yimti süngjema kümogo, saka nisung maliba yimti ka mesüka kümogo," ta

yimti nung alir Adan Hussein-i Reuters news agency dang ashi. Southwest nung yimden yimsüsüba tsütsü temelenshi tenzüko, aser finance minister, Ahmed Mohamed Hussein acting tir asütsü shimogo. Mogadishu nung centre sorkari state nung temelenshi adokba atema tenüngsang agütsüogo aser kasa mapang nung süngjemshitsü aser longjemer alitsü ayongzüka liasü. Mogadishu-isa, sorkar anema mang ayangtsü nokdakba khenyongi magizüktsü ta ashiba den, temelenshi mapang taküm aser ki-o-jen kümzüka ayutsüji ajak dang tongtibangtiba lir, ta neneshia metetdaksüogo.

### Ukraine-i Russia indang Ust-Luga port maneni amak

**Moscow, Metsüremi/March 31 (Agencies):** Ukraine-i drone yoka Mongolbarnü Russia indang Baltic Sea port Ust-Luga makogo. Anogo 10 tsüngda Ukraine-i tang agi pongubenbuba iba tesem ya makogo. Industry source balalai ashiba agi, iba tesem nung totzü load asüba terminal ka makogo aser iba ajanga Russia totzü export asütsü asoshi tetsükdaksü adokdaksüogo. Kyiv-i taoba ita ishika Russia indang totzü export asüba infrastructure tem maka arudar. Parnoki rara tenzüker küm pezübuba nung tang Baltic tzyüim nung Ust-Luga aser Primorsk port na tesashitiba maka arudar. Item tesemtem nung drone amshia pipeline tongtibang ka aser tanker tem amakba ajanga Russia totzü export asüba shilem 40 bo sota lir, ta market

data dak ajemdaker Reuters-i asatetba metetdaksüogo. Regional governor Alexander Drozdenko-i ashiba agi, tanur ana densema nisung asem yirur tang temang anepaludar aser ki aika raksatsüogo. Telegram ajanga pai ashiba agi, iba tesem nung air-raid alerts agüja alibabo anenogo, saka port ya koba tashi ka raksa iba indang osang tejangja magütsü. Industry source aseme Reuters dang ashiba agi, Ukraine nunger indang drone tem yagi Russian pipeline monopoly Transneft (TRNF\_p.MM)-i achaayangba crude oil loading facility tem dak kongshia liasü. Ajisüaka ken o dak sendakba nung Transneft-i telangzüba kecha magütsü. Gulf of Finland south-eastern tzyüküm nung amendaka

aliba Ust-Luga rongnendak ya oil-processing facility aika amenokdar aser export terminal tema aika amenoka lir, koba ajanga totzü aser totzü agi yangluba osettem achaayanger. Data ka ajanga iba port nungi taoba küm totzü product metric tons million 32.9 export asüba sayuogo. Iba tesem nung anogoshia masüngtet aliba totzü barrel 700,000 shi achaayanger. Ketdangsürtemi ashiba agi, Ust-Luga ya March 22, 25, 27, 29 aser 31 nü maka liasü, aser iba ajanga export inyakyim sota atatsüsa aküm. Ukraine tir Volodymyr Zelenskiy-i Hombarnü ashiba agi, Ukraine nunger den sendaka aliba linük kari Kyiv dang Russia indang oil sector amakba anentsü asoshi temaitsü kar yokogo, kechiyong alima ajunga nung tang totzü jenjang kanga aika kümör lir.

**MULUNGNEN O**

**Late. TALIPOKLA (Chuchuyimlang)**  
(Tasoba 24.06.1923 - Tasüba 23.03.2026)

Temeim Ojala Late. **TALIPOKLA (Chuchuyimlang)** mapang talangka shiranga aruba anogo nungi tasüba anogo tashi nung temeimertem shirnokisa onok den sarasadem, nubu aser rongsen agi yariteba aruogo, nenok ajak dang kanga sa pelaba metetdaksür. Tsüngremi nenok ajak moajangma.

**"Oja! Nü temeim teti onok mulungjang nung lir"**

- Temeim Chirnur, Kinungertem, Semchisemnur.

<b>EMERGENCY SALE</b>	Ali tesazük <b>106000sqft</b> shi nung rubber tong 500 shi tang teyimdak (harvesting)
<b>TAYOKTSÜ</b>	Tuli Paper Mill (Tzüdikong-Amguri Road 10 <sup>th</sup> Mile nungi furlong ka shi pilar lir. Talitsü ki (RCC), smoke house, rubber machine aser osettsüset ajak peria lir. Jenjang Rs.50/sqft only (slightly negotiable) No Broker. <b>Contact: 9615445779</b>
<b>LIR</b>	

### Afghanistan tzümetsüng lendong nung nisung 22 asü



**Kabul, Metsüremi/March 31 (Agencies):** Afghanistan nung taoba anogo ana tsüngda tzünglu kanga sashia aruba ajanga tzümetsüng adokdaksüba den ki chirepa sülen nisung 22 süogo aser nisung 32 yiruogo, ta linük National Disaster Management Authority (NDMA)-i Hombarnü metetdaksü. NDMA-isa, tsüngsang mopung kanga majung asünung iba amala mesükba lendong tali ataloktsü akok ta tekümdangtsü metetdaksüogo. Asürtem ya timba Parwan, Maidan Wardak, Daykundi aser Logar densema central aser eastern province tem nungi timba liasü, kong tzünglu kanga sashia aruba ajanga tzümetsüng adokdaksüogo aser iba ajanga tenem nung aliba yimtsüngtem nung ki chirepa lendong tulu ajangshio, ta ketdangsürtemisa metetdaksü. Hombarnü tashi nunga linük kübok tesem aika nung tensa mejungi liasü aser tzünglu taliba arua tesem kar maneni metsüngtsü ana nung lir, ta NDMA-isa metetdaksü.

"Taoba anogo ana tsüngda province 13 nung tzümetsüng aser tsüngsang mopung dak sendakba tanga tatalokba tem nung nisung metsür ana süogo, 32 yiruogo aser ki 241 raksaogo," ta NDMA ketdangtsür kati metetdaksü. Afghanistan ya yipru mopung aser menoknok amala lendong tulu agi kanga bulua kongshiba linük ka lir, aser United Nations-i iba linük ya tzümopung melenshiba ajanga kanga mejungi kongshiba linktem rongnung züngoksemja lir. 2021 küm Taliban-i sorkar atsüngba sülen linük aser lokti tentet balalai parnok nem teyari agüja aliba kanga ajema kümogo, koba sorkar rongsenketzung tongtoret liasü. Teyari balala agüja aliba anenba sülen linük kanga timtemba mapang ka lir. United Nations Development Programme kati November ita ashiba agi, menoknok, tzümetsüng aser tsüngsarusa agi Afghanistan nung 2025 küm ki 8,000 raksatsüogo aser public service dak kanga mejungi kongshio.

## Sheetal Devi nem 'Para Archer of the Year' naroküm agütsü



**Metsüremi/March 31, 2026 (Agencies):** India tsür Sheetal Devi nem World Archery-i Hombarnü 'Para Archer of the Year 2025' naroküm agütsüogo.

Arishi küm 19 tain Jammu & Kashmir nungi asayar ya teka anaprongla maketba tetsürtem rongnung World Para Archery Championships nung gold medal anguba mezüngbuba asayar lir, aser iba amala mesükba asayartem rongnungi la kijai dang gold medal ngua lir.

Taoba küm Gwangju, South Korea nung asayaba mapang lai tetsür compound kija asaya nung gold medal ngua liasü.

Sheetal ya teka maket aso, saka lai la tetsüng aser tapu kanga junga amshia lasang khateter. Laisa, World

Championships nung medal ajak nguogo. Lai tetsür team asaya nung silver aser temeyoktep asaya nung bronze medal nguogo.

"India tsür Sheetal Devi-i para archer of the year category nung takok nguogo. Gwangju nung world title ka anguba densema lai season tepeyong kanga junga asayaogo," ta World Archery-i ashi.

World Championship nung gold anguba den bendenloksema Sheetal-i ano Paris Paralympics nunga tebur tetsür temeyoktep team asaya nung bronze medal ka nguogo aser iba den 2022 Asian Para Games aser 2023 Asian Championships, Bangkok nung silver medal nguogo.

"Alima nung para archer tajungtibatem den nominate süa @worldarchery-i best para archer naroküm agütsüba atema kanga pelar," ta Arjuna award ngur alila Sheetal-i X ajanga Hombarnü ashi.

Iba nroküm ya 2011 küm nungi agütsür aser iba yagi saisabong nung tangar dang nungi alia tajungba asayartem tushir.

Taküm iba award ya category ti atema agütsüogo. 'Archer of the Year,' naroküm Turkey nung Emircan Haney nem agütsü; 'Young Archer of the Year,' naroküm France nung Baptiste Addis nem agütsü aser 'Best Team of the Year,' naroküm ya Korea indang tebur recurve team nem agütsüogo.

## Fakhar nem asaya ana atema tenokdangba agütsü



**Metsüremi/March 31, 2026 (Agencies):** Ball tamper asüba ken o nung aibelen aliba ngutetba sülen Fakhar Zaman nem Pakistan Super League nung asaya ana atema tenokdangba agütsüogo.

Iba aibelen atema umpire temi asaya nung Lahore Qalandars merenshiba sülen arishi küm 35 tain asayar ya Pakistan Cricket Board (PCB)-i merenshiogo. Deobarnü PSL nung Karachi Kings den asayaba mapang iba aibelen ya

mena liasü.

Iba tatalokba ya asaya akoktsü atema Karachi pur tatembangbuba over nung run 14 nüngdaka asayaba mapang ataloka liasü. Fakhar, Lahore captain Shaheen Afridi, aser fast bowler Haris Rauf nung mapang tatsüka agia sensaksemba mapang Fakhar aser Rauf na tena yongtsü nung ball belentepa liasü.

Iba sülen umpire-i Rauf dangi ao aser ball reprangdangtsü meshi. Square-leg umpire den

sensak asemba sülen umpire yagi Karachi nem penalty run pongu agütsü aser ball melentsü tetuyuba agüja liasü.

Ken o ya Hombarnü tatembangsa angadang aser PCB sangdong ka ajanga Mongolbarnü Fakhar nem PSL nung asaya ana atema tenokdangba agütsüba metetdaksüogo.

"Fakhar-i pai aibelen kecha masü ta shiogo aser code of conduct dak ajemdaker disciplinary hearing ka agia liasü," ta PCB-i ashi.

"Match referee Roshan Mahanama-i achaayanga disciplinary hearing ya agi aser kuli ajak kanga junga asadangba sülen personal hearing ka atema Fakhar nem maangka agüja liasü."

Ghonda 48 tsüngda temepishiba ka benoktsü atema Fakhar ket nung maangka lir.

Cricket asaya temzüng ozüng ajanga ball meyushitsüba dak alaker ball raksa amshitsü memelar.

Fakhar ya Pakistan nung international asayar ka lir. Pai tang tashi nung Test asem aser ODI 92 nung asayar lir.

## Mokokchung Inter-Ward Football Tournament asayaba osang



**Mokokchung, Metsüremi/ March 31 (TYO):** 7Buba Mokokchung Inter-Ward Football Tournament-2026, tanü Quarter Final Match ana asaya liasü. Mezüngbuba nung Sangtemla Ward aser Tongdentsüyong Ward asayaba nung minute 41buba nung Sangtemla Ward nungi j.10 Meyasenbai goal-1 yok aser ibaji minute 53 buba nung Tongdentsüyong telok nungi j.no 13 Atoshe-i goal-1 yokteta kasasa aküm aser tatem tonga asayar külen penalty metsütepba nung Tongdentsüyong Ward goal-5 aser Sangtemla goal-4 ta yoktet nung Tongdentsüyong Ward-i iba asaya kokteta Semi Finals asayatsü maoangka ngutetogo. Tanabuba asaya Arkong

Ward aser Mongsenbai Ward tsüngda asayaba nung asaya tenzükli minute 1 nung Arkong telok nungi j.no 10 Nungshisashi-i goal-1 yoktet, iba sülenbo minute 22 aser minute 35buba nung Mongsenbai telok nungi j.no 19 Imnatoshi-i goal-2 yok, minute 50 nung j.no-15 Yangersosang-i goal-1 yok aser ano minute 55buba nung j.no-10 Asish-i goal-1 yok, iba sülen Arkong telok nungi minute 72buba nungi j.no-17 Manwong-igoal-1 yokteta liasü saka ano minute 95buba nung Mongsenbai telok nungi J.no-3 Shiponglepba-ia goal-1 yokteta iba asaya Mongsenbai Ward-i Arkong Ward goal-5-2 agi kokteta Mongsenbai Ward semi Finals asayatsü maoangka ngutetogo.

## Ghana coach Otto Addo mapa nungi anentsüogo



Addo ya Germany nung aso aser pa Borussia Dortmund nungi asaya liasü. Pa ya 2024 küm March ita linük coach asütsü tanabenbuba shim. Pa lenisüba nung Ghana team 2022 küm Qatar World Cup nung asaya, saka parnok group-stage nung tsükatok.

Qatar nung asayaba mapang Ghana-i goal 3-2 agi South Korea akok, saka Portugal aser Uruguay na makokba sülen tsükatok.

Arishi küm 50 tain coach lenisüba nung Ghana team North America nung taruba World Cup atema qualify süogo, kong parnok June 17 nü Toronto nung Panama den mezüngbuba asayatsü. Parnok Group L nung Croatia aser England na den ata lir.

Ajisüaka Africa Cup of Nations pezüben koker aliba team ya 2025 küm Morocco nung iba asayamung atema qualify mesüteti liasü. Parnok küm 21 sülen taoba küm mezüngbuba AFCON atema qualify mesütet. Team nung Premier League asayar Antoine Semenyo aser Mohammed Kudus nung amala asayartem liaka parnoki Africa nung asayamung tulutiba atema qualify mesüteti liasü.

**Metsüremi/March 31, 2026 (Agencies):** FIFA World Cup tenzüksü anogo 72 dang anunga lia Ghana-i coach Otto Addo mapa nungi anentsüogo, ta Germany den friendly asaya ka makokba sülen ghonda ishika dang lir linük football ?association-i metetdakja liasü. "Ghana Football Association (GFA) aser senior tebur national team head coach Otto Addo na pilaogo," ta linük nung football achaayangba lokti tentet yagi Hombarnü sangdong ka ajanga metetdaksü.

GFA-i Addo melentsüpur indang mesüra pa mapa nungi kechiba anentsü, iba indang osang tejangja magütsü..

Stuttgart nung Germany den friendly asaya ka makokba ya Ghana team asoshi friendly asaya pongbuba makokba liasü. Ghana team-i Hokolbarnüa Austria goal 5-1 agi mekoki liasü.

## BILEMDANGANG

"Nüsasa na meimtsü tamasa angazükang."